

Bosna i Hercegovina

Federacija Bosne i Hercegovine

**TUZLANSKI KANTON**

**KANTONALNI SUD U TUZLI**

Broj: 003-0-Su-23-000 105

Datum, 14. juli 2023. godine

***STATISTIČKI IZVJEŠTAJ O POŠTIVANJU OPTIMALNIH I PREDVIDIVIH ROKOVA***

***U PERIODU OD 01.01.2023. GODINE DO 30.06.2023. GODINE***

U skladu sa članom 15. stav 1. Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini, a shodno Odluci o predvidivim rokovima Kantonalnog suda u Tuzli, dostavljamo Vam statistički izvještaj o poštivanju optimalnih i predvidivih rokova za prvih šest mjeseci 2023. godine.

***Analiza pokazatelja iz statističkog izvještaja o poštivanju optimalnih i predvidivih rokova:***

Statistički izvještaj o poštivanju optimalnih i predvidivih rokova iz CMS-a dostavlja se u prilogu obzirom da je isti u pdv formatu.

Analizom navedenih pokazatelja konstatovano je da je do prekoračenja predvidivih rokova došlo na referatima koji imaju najveći broj neriješenih predmeta i na kojima su sudije zadužene velikim brojem neriješenih predmeta koje ne mogu iz objektivnih razloga staviti u rad. U Kantonalnom sudu u Tuzli na početku izvještajnog perioda tj. sa 01.01.2023. godine na svim referatima bilo je ukupno neriješenih 4.535 predmeta. U izvještajnom periodu, za prvih 6 mjeseci primljeno je na svim referatima 2.327 predmeta, tako da je ukupno u radu bilo 6.862 predmeta, što znači da su sve sudije u ovom periodu bile radno angažovane svaki bi sudija u prosjeku bio zadužen sa 237 predmeta. Međutim, zbog dugotrajnog postupka izbora novih sudija, a također i zbog odsustva nekih sudija usljed bolovanja, broj neriješenih predmeta nije se smanjio onako kako smo planirali. U prvih šest mjeseci 2023. godine na svim referatima riješeno 2.506 predmeta i od tog broja u optimalnom roku riješeno je 894 predmeta, u predvidivom roku 1.868 predmeta i sa prekoračenjem predvidivog roka 638 predmeta i to u 544 drugostepenih parničnih predmeta, u 66 drugostepenih predmeta o žalbi „Dn“, u 14 prvostepenih krivičnih predmeta, u 1 prekršajnom predmetu po žalbi, te u neznatnom roku do 5 dana u postupku ponavljanja parničnog postupka i postupku upisa u registar poslovnih subjekata.

Najveće prekoračenje predvidivog roka, kao i u prethodnim godinama došlo je u građanskim predmetima, a radi se o 544 parnična predmeta. Do ovog prekoračenja došlo je zbog velikog opterećenja sudija koji su zaduženi sa velikim brojem neriješenih predmeta i svaki sudija na građanskom referatu zadužen je u prosjeku sa oko 230 predmeta, što predstavlja nešto veću godišnju normu svakog sudije koji radi na ovom referatu, bez priliva novih predmeta i objektivno zbog velikog broja predmeta ne mogu se ispoštovati predvidivi rokovi, iako je u odnosu na prethodne godine značajno smanjeno opterećenje sudije sa ukupnim brojem neriješenih predmeta, jer je došlo do povećanja broja sudija. Na ovom referatu do 30.06.2023 godine radilo je 20 sudija, a u mjesecu maju 2023. godine od strane Visokog sudskog i tužilačkog vijeća BiH izabrano je još dvoje sudija, pa se očekuje i povećanje broja sudija na građanskom referatu.

Na prvostepenom krivičnom referatu došlo je do prekoračenja predvidivog roka u 14 predmeta, jer se radi o predmetima koji su složeni i u kojima krivični postupak zbog složenog dokaznog postupka traje duži vremenski period. U jednom broju ovih krivičnih predmeta, predmeti se zbog procesnih razloga ne mogu staviti u rad, jer su optužena lica nedostupna i protiv njih su raspisane potjernice. Prije svega radi se o predmetima ratnih zločina koji su zbog nedostupnosti optuženih lica blokirani i ne mogu se raditi. Na ovom referatu trenutno radi 6 sudija, jer je šesti sudija izabran u mjesecu martu 2023. godine. Prioritet u radu imaju predmeti ratnih zločina, organizovanog kriminala i korupcije, te je intencija predmeti koji su aktivni i kojima postoje procesne pretpostavke da se u predmetu može suditi, u tim predmetima treba zakazivati glavni pretres i nastavke pretresa u što kraćim rokovima.

Na drugostepenom krivičnom referatu nije bilo prekoračenja predvidivog roka ni u jednom riješenom predmetu, a riješeno je u ovom periodu 227 predmeta od čega je 164 predmeta riješeno u optimalnom roku, a 227 predmeta u predvidivom roku.

Na drugostepenom prekršajnom referatu sa prekoračenjem predvidivog roka riješen je 1 predmet od ukupno završenih 237 predmeta. Prekršajne predmete trenutno radi dvoje sudija i ovaj referat je izuzetno ažuran.

U ostalim vrstama sporova i to postupak upisa u registar poslovnih subjekata i po vanrednim pravnim lijekovima u sasvim neznatnom broju predmeta došlo je do prekoračenja predvidivog roka od ukupnog broja riješenih predmeta na tim referatima.

Broj neriješenih predmeta na kraju izvještajnog perioda je 4.356 predmeta, što znači da se smanjio broj neriješenih predmeta za 179 predmeta u odnosu na početak godine i to iz razloga jer se povećao i broj sudija u sudu. Prosječno trajanje riješenih predmeta iznosi 440 dana, a prosječno trajanje neriješenih predmeta iznosi 311 dana, što predstavlja značajno smanjenje u odnosu na prethodnu godinu.

Problem predvidivih rokova ne bi bio toliko izražen da sudije rade samo zaostale neriješene predmete koji su određeni Odlukom o predvidivim rokovima sa danom 01. januar 2023. godine, ali problem postoji jer se predmeti u ovom sudu rješavaju prema Planu rješavanja predmeta, te ukoliko je predmet star i došao na rješavanje po žalbi u ovaj sud, uzima se odmah u rad, pa stoga postoji nesklad između Plana rješavanja predmeta i Odluke o predvidivim rokovima prema kojoj se predmeti trebaju uzimati u rad prema starosti inicijalnog akta kojim je pokrenut postupak pred ovim sudom.

#### ***Analiza raspoloživih resursa u sudu:***

Kantonalni sud u Tuzli pokriva područje 8 općinskih sudova i postoji nesrazmjer između postojećeg broja sudija Kantonalnog suda u Tuzli i sudija i stručnih saradnika koje je izabralo Visoko sudsko i tužilačko vijeće BiH, a koji rade u općinskim sudovima na području Tuzlanskog kantona, a koji problem smo isticali i u prethodnim godinama. Ovaj nesrazmjer nije ni do danas izbalansiran, tako da postojeći broj sudija, obzirom da su zaduženi velikim brojem neriješenih predmeta, ne mogu rješavati sve predmete u predvidivim rokovima. Sa 30.06.2023. godine u Kantonalnom sudu u Tuzli radilo je 29 sudija, uključujući i predsjednicu suda, s tim što je jedan sudija dodatni sudija. Od 03.07.2023. godine u sudu će raditi još dvoje sudija koje je izabralo Visoko sudsko i tužilačko vijeće BiH u mjesecu maju 2023. godine. U narednom periodu ovaj sud će voditi aktivnosti za obezbjeđenje sredstava radi popune sistematizacije u pogledu sudija koji nedostaju.

I u 2023. godini u ovom sudu je izražen problem nedostatka administrativno – tehničkog osoblja (daktilografa) koje bi bile u funkciji podrške rada sudija, jer obim posla koji se povećao radom na CMS-u i konstantno povećava, zahtijeva da svaki sudija ima svog saradnika – daktilografa, a što zahtijeva i dodatna sredstva u budžetu. Posebno naglašavamo, da su sve sudije maksimalno

angažovane na svojim referatima, te da u skladu sa donesenim Planom rješavanja predmeta rade stare predmete i dosljedno se pridržavaju tog plana, kao i Plana rješavanja stečajnih predmeta i predmeta proizašlih iz stečajnih postupaka.

***Analiza „perioda neaktivnosti“ u predmetima:***

U ovom izvještajnom periodu u Kantonalnom sudu u Tuzli je na snazi Plan rješavanja predmeta, te se u skladu s tim Planom sačinjavaju kvartalni planovi i predmeti dodjeljuju sudijama u rad prema starosti inicijalnog akta kojim je pokrenut postupak pred općinskim sudom i prema starosti faze kojom je predmet zaveden kod ovog suda. Također je na snazi Plan rješavanja stečajnih predmeta i predmeta proizašlih iz stečajnih postupaka i ovi predmeti kao hitni po zakonu prioritarno se uzimaju u rad. Predmeti u sudu su ravnomjerno raspoređeni na sve sudije, tako da su u pogledu ukupnog broja predmeta sudije ravnomjerno opterećene. U nekim prvostepenim krivičnim predmetima zbog raspisanih potjernica protiv optuženih lica, predmeti su neaktivni i ne mogu se raditi, tako da su u CMS ti predmeti određeni kao nerješivi. Na građanskom referatu i drugostepenom krivičnom referatu, postoji opravdana neaktivnost rada na predmetima, jer sudije objektivno zbog velikog broja zaduženih predmeta i pritvorskih predmeta, ne mogu predmete uzeti u rad, jer 85% mjesečne norme isključivo rade stare predmete, a preostali dio norme od 15% pritvorske predmete, predmete nasilja u porodici, predmete stečaja, kao i ostale predmete po zakonu hitne prirode.

U građanskim predmetima, ali u neznatnom broju predmeta, postoji neaktivnost u predmetima, jer su predmeti od strane građanskog vijeća ovog suda, vraćeni prvostepenom sudu na izviđajne radnje prije odlučivanja o žalbi i takvi predmeti su u CMS sistemu označeni kao nerješivi.

***Prijedlog mjera kako bi se utvrđeni predvidivi rokovi skraćivali i približavali optimalnim rokovima:***

- Potrebno je u Kantonalnom sudu u Tuzli do kraja 2023. godine izvršiti popunjavanje sistematizacije suda sa sudijama koji će otići u penziju, jer je konkurs za potpunu ovih sudijskih pozicija od strane Visokog sudskog i tužilačkog vijeća bio objavljen u mjesecu maju 2023. godine. Radi se o dvoje sudija koji odlaze u penziju i to jedan sudija radi na krivičnom referatu, a drugi sudija na građanskom referatu. Ukoliko se ne izvrši blagovremeno popunjavanje ovih pozicija značajno će se to odraziti na ukupne rezultate rada suda, jer predmete kojima su ove sudije zadužene morali bi se rasporediti postojećim sudijama, a sudije objektivno te predmete ne mogli uzeti u rad.
- Potrebno je izvršiti popunjavanje uporažjenih pozicija administrativno – tehničkog osoblja koje je u funkciji podrške rada sudijama, jer je značajan broj zaposlenika ove kategorije u ovoj godini otišao u penziju.
- Visoko sudsko i tužilačko vijeće BiH treba skratiti rokove provođenja procedure izbora sudija, a pogotovo u sudove koji imaju veći broj neriješenih predmeta.
- Visoko sudsko i tužilačko vijeće BiH kada postoji mogućnost u skladu sa zakonom, treba koristiti institut delegacije sudija iz sudova koji su ažurni u sudove koji imaju veliki broj neriješenih predmeta, jer jedan dio kantonalnih sudova nemaju predmeta za rad, a sudije u tim sudovima nisu zainteresovane da budu delegirane na rad u drugi sud.

**PREDSJEDNICA SUDA**

Indira Hadžimehmedović